

TE HEHEURAA API



MATI 1940

TE MAU API NO TE RAAU ORA TE IVA O TE API

U A reva te paeau mo'a tei na ô e, *Ia ore te taata ia fanau i te pape e te Varua ra, e ore oia e ô i te basileia o te Atua ra.* E ture faataahia te reira. Eita roa e tia i te hoê taata ia faahuru ê te ohuraa o te mau fetia e a ore râ, ia faahuru ê atoa i te mau ture tei faatere i te mau mea atoa, no reira, eita atoa e tia ia'na ia faahahi ê te mau ture a Iehova e a ore râ ia faahuru ê i te hoê vahi iti a'e te mau ture e te mau faaueraa o te evanelia mure ore. Eita atoa o Oia, o tei arii i te ao ite-ore-hia, e i te ao nei ta tatou e ite nei, e hapi'o rii a'e i te mau ture ta'na i faatia i roto i tera ao e i roto atoa i teie.

Te baptizoraa, oia hoi te fanauraa i te pape e te varua ia tei faaitheia a'enei, o te hoê ia oro'a tumu. Te vai atura te tahi atu â mau oro'a tei faataahia, i to ratou taime tia, no te faaoraraa o te taata. E mea tia roa ia horoahia e ia fariihia te reira na roto i te tia, mai te mea aita, eita roa e oaoahia i te mau haamaitairaa o te hotu mai na roto i te reira. Mai te mau taata êê o te ore roa e tia ia riro ei melo no te hoê hau, maori râ ia haapao ratou i te mau ture tei faataahia no te reira ohipa, hoê atoa ia i te mau taata êê i te basileia o te ra'i, eita roa e tia ia ratou ia tomo i roto i te reira basileia, e a ore râ, ia fariihia i roto i te hui fetii o te Arii mure ore, maori râ ia haapao ratou i te mau ture tei haapao-hia no to ratou fariiraahia.

E faaitheia te reira mau ture i te mau taata atoa o teie nei ao, i roto i te tino e a ore râ i rapae i te tino. E noaa ia ratou te ravea ia farii e a ore râ ia patoi ia ratou na roto i te tiamâraa tei horoahia i te taata, ia tia ia haavahia ratou ma te parau-tia ia tae i te mahana haavaraa ra. Area râ, te mau oro'a no te baptizoraa, te tuuraa o te rima no te tamauraa,

te faaipoiporaa, e te faatoro'araa, no te pae tino ana'e ia. Ua faataahia ratou no te tau o te tamataraa.

Te pape nei, e amuiraa materia ia no te fenua nei, e eita te poheraa, te tanuraa, e te fanauraa apî e noaa, mai tei faauehia e noaa mai, maori râ, ia na roto i te bapetizoraa i te pape e te feia e mana to ratou. Ua milioni e ua milioni te mau tamarîi tamaroa e te mau tamahine o te ao nei tei faarue i te tino nei ma te haapao ore i te ture no te bapetizoraa. E mea papu e rave rahi roa to ratou te farii ma te oaoa te parau e te ture a te Fatu ia porohia te reira i roto i te ao varua. Area râ, eita e tia ia ratou ia haapao i te mau faaue-raa tei faataahia no te ao ta ratou i faarue ra. Eaha, eita a nei e tia ia rave i te hoê ohipa no ratou? Ia opanihia anei ratou i rapae i te basileia o te ra'i? Te na ô maira te parautia e te aroha i te pahonoraa e, *E* no te uiraa matamua, e *Aita* no te piti o te uiraa. Eaha ia te e'a no to ratou faaoraraa?

Ia bapetizohia te feia e ora nei no te feia i pohe, e te vai atura te tahi mau oro'a te tia ia ravehia na roto i te monoraa. Teie parau mau hanahana, tei hunahia i te taata i na tenetere e rave rahi, ua faaitohia ia i roto i teie tau tuuraa e vanelia rahi hanahana hopea. O te maramarama mau i roto i te pouri. E anaana oia i roto i te poiri o te mau tau tahito e e haamaramarama i te tau i mua nei, e te faaite mai nei e, te here faito ore o te Atua e to'na aroha mau i ta'na mau ohipa atoa. Te tatara mai nei te reira i te mau parau papai tei mana'ohia e, e mea fifi e te poiri. E tuati faahou te reira i tei pohe e te ora nei na roto i te here. Te faaite atoa maira te reira e, *eita to tatou mau metua e maitai roa ra, maori râ ia tatou*. E iriti te reira i te uputa o te ora i te mau Etenne e rave rahi tei pohe e ana. E amui atoa te reira i te mau taata tei roto i te Mesia ei hoê, noa'tu ua faataa-ê-hia ratou e te paruru te vai i rotopu i te ao varua e te ao tahuti nei. E horoa te reira te mana i te mau tane, e te mau vahine, ia riro ratou *Ei mau faaora i nia i te mou'a o Ziona*, ma te faaterehia e Iesu te raatira rahi o te nuu o te feia faaora.

E ere te fare o te Atua i te fare o te anoi noa. Te vai ra te e'a mau e te vahi mau i faataahia no te raveraa i te mau ohipa no te feia i pohe ra. E tia i te mau fetii no te feia i pohe ra, mai te mea ua farii ratou iho i te fanauraa o te pape e te varua ra, ia tia ei mono no tei pohe, e ia farii i te mau oro'a te tuuhia ei faufaa no tei pohe ra. E mono iho â te tane i te tane, e te vahine i te vahine. Eita e tia ia bapetizohia te tane no te vahine, e te vahine no te tane. Tei te

Ua tamaiti matahiapo te tia ia rave i te reira ohipa monoraa, mai te mea ua tano oia no te reira ohipa. E mea tia ia ravehia te reira mau oro'a e te mau feia e mana to ratou, tei faataa-mau-hia no te reira ohipa, e ia itehia te reira e ia papai atoa-hia hoi i roto i te mau buka tuatapapa. Ia tano te papairaa o te mau buka o raro nei i te mau buka o te ra'i.

E te vahi no te raveraa i te reira mau ohipa, o te hoê ia hiero te patuhia no te Atua teitei, mai te au i te hoho'a ta'na e horoa mai. E tuuhia te au a bapetizoraa, tei hamanihia mai te miti veo i roto i te hiero o Solomona, i raro roa, i raro a'e i te vahi e haaputuputu ai te feia e ora nei, no te faaite-papu-raa i te vairaa o tei pohe, ia au maitai te mau mea no te pae varua i te mau mea o te pae tino nei. No te mea, o te mau mea te ravehia i te ao nei, mai te au i te mau faa-ueraa o te ra'i, e fariihia te reira i te ra'i e e mana te reira i roto i te ao a muri atu. I reira e faaitehia'i te mana o te Autahu'araa, o te tamau, e a ore râ, te tuu i raro nei, e i reira e tuu, e e tamau-atoa-hia ia i te ra'i mai te au i te mau faa-ueraa e te mau heheuraa o te Atua, na roto ia Iesu tei faa-tahinuhia.

Te haere nei te ohipa no te monoraa mai te hoê avei taura auro na roto i te taatoaraa o te ahu no te faaoraraa. O Iesu Mesia te mono toto no te taatoaraa o te feia hara. Ua pohe te Taata hara ore ei mono i te mea viivii. O Oia te tusia no te hara pohe a Adamu. Te pinia mamoe i nia i te fata ra, te puaaniho pae ra, te pipiraa toto no te faaoreraa hara, e te mau tusia atoa no te faufaa tahito e te tusia rahi no te faufaa apî ra, ua faatumuhia ia i nia i te ohipa monoraa ma te fariihia e te Atua. Ua faaitehia te reira parau mau i roto i teie nei tau tuuraa hopea o te evanelia e te peropheta ra o Eliaha, i roto i te hiero tei patuhia no te Teitei e te Feia Mo'a i Ketelani, Ohio. I te 3 no Eperera 1836, ua fa mai tei rave-tino-hia i nia i te ra'i ia Iosepha Semita raua o Olive Kaudere, e ua horoa mai oia i te taviri no te faafariuraa i te aau o te mau metua i te mau tamarii, e te aau o te mau tamarii i to ratou mau metua, ia faaorahia te ao nei i te ino. E i teie nei ua faatiahia te feia e ora nei ia rave i te ohipa no te feia i pohe ra, mai te au i te mau ture i horoahia mai, e te fariu mai nei te mau metua, i te ao varua ra, i ta ratou mau tamarii i roto i te tino nei ma te tia i rave ratou i te mau ohipa no ratou tei ore i tia ia ratou ia rave a vai ai ratou i roto i te tino.

O te hoê haamaitairaa hau ê te reira tei tuuhia mai i nia i te upoo o te feia mo'a i roto i te tuuraa hopea o te mau tau.

E mea tia ia ravehia te ohipa no te feia i pohe ra, e ia imihia te mau parau tuatapapa o te mau tupuna, no te taatiraa i te mau avei o te fetii i moe ra e tae noa'tu i te huaai o Aberahama, te tumu ia no to ratou haamataraa. E i reira e itehia'i te haamaitairaa te noaa mai i te taata o te haapû i to'na huaai i nia i te ao nei. Ua riro, i te mau tau tahito i roto i te nunaa a te Atua, ei ati rahi ia ore ia noaa te huaai. Ua itehia e, e tuatihia te mau hanahana, te mau basileia, te mau oaoa e te mau oaoa no te ao a muri atu i roto i te tupuraa utuafare ra, e te fafau tei parauhia ia Aberahama no nia i to'na ra huaai, e ere ana'e ia no teie neie ao ana'e, ua parau-atoa-hia ra no te mau haamaitairaa no te ao a muri atu.

Te afai mai nei te reira mau haapiiraa i te mau taviri no te paruru no te ao a muri atu. E faaafaro te reira i te mau tahoêraa i rotopu i te feia e ora nei e te feia i pohe ra. E faaora te reira i te mau taata te farii i te mau faaiteraa a te mau varua haavare. Eita te parau faaite o te mau hoa i pohe ra e tae mai na roto i te anoi noa, eiaha atoa na roto i te hinaaro o te mau tane e te mau vahine tei viivii, e a ore râ, tei mâ. E afaro noa te mau ohipa e te mau e'a a te Atua. E tae mai ia te ite e au, no te mau ao varua ra, na roto i te e'a i faataahia e i te vahi i haapaohia ra. O te hiero ia te vahi i faataahia no te raveraa i te ohipa no te feia i pohe ra, e no te faarooraa i te parau no te feia i pohe ra. Mai te mea e, ua tia, e farii te Autahu'araa i roto i te tino nei, i te mau parau no ô mai i te Autahu'araa i muri i te paruru. Ua faataahia te mau vahi, i roto i te hiero, no te parauraa no te mau ohipa mo'a no te faaoraraa o te mau taata atoa.

Te titauhia nei te Feia Mo'a atoa ia imi ratou, ma te ito-ito, to ratou atoa mau parau tuatapaparaa tupuna, e ua tae mai te hoê varua i nia i te ao nei tei faatupu i roto i te mau taata te mana'o ia imi, ia haaputu e ia faaite i te parau o to ratou mau tupuna, e na roto i te reira ravea na tausani e ua tausani te mau i'oa tei noaa mai, e ua rahi roa te bapetizoraa no te feia i pohe ra tei oti na roto i te reira ravea. Area râ, ua rahi roa'tu te ohipa e toe nei, e eita e tia ia feruri e, i teihea tau te reira e oti ai, maori râ, ia haamaramaramahia mai e te Atua. Ia ravehia râ te reira, e e haamaitaihia te feia e tauturu i te faaotiraa i te reira ohipa hanahana! Eaha te huru o te oaoa te tupu ia farerei ratou i to ratou mau tupuna i Paradaiso! Eaha te huru o te hanahana te faakonahia i nia ia ratou ia tao i te mahana no te faautu'araa! E tia ratou i rotopu i te mau faaora, e e anaana ratou i rotopu i to ratou mau fetii tei faaorahia, mai te mau mahana

e anaana nei i roto i te reva nei !

Teie ravea faaoraraa no te ra'i mai, o te apĩ ĩa tei hau atu i te aano, te anaana e te nehenehe no nia mai i te raau o te ora. Te hopoi mai nei te reira i te raau faaora no te mau milioni e rave rahi o te mau tamarii tamaroa e te mau tamarii tamahine o te ao nei tei pohe ma te faaroo ore i te i'oa tei horoahia mai no te faaoraraa i te taata, e mai te mea ua faaroo ratou, aita ratou i haapiihia te e'a no te ora mai tei faauehia na roto ia Iesu Mesia. E faaiteraa te reira i te here o te Metua mure ore, e te vai nei te noanoa e te aroha e te mauruuru o te mau tamarii o tei titau atu i to ratou mau metua, e te haamaitairaahia o te mau metua na roto i te mau ohipa a te mau tamarii, e te here fetii tei faarahihia, tei haapaarihia e tei faataehia'tu e a muri atu. E faataa te reira i te paruru tei vai i rotopu i te ora nei i tei pohe, e e haamärũ nei i te mau mafatu, e te faatae nei te reira i te mau feia e ora nei, e tei pohe atoa hoi, i pihai-roa-iho i te Atua, ma te faaĩ ia ratou i te auraro e te haamoriraa Ia'na tei faataa i taua ravea rahi faahiahia no te faaoraraa i te mau taata atoa.

*Papahia e C. W. Penros, te hoē Aposetolo
Faauhia ei reo Tahiti e K. R. Stevens
Peresideni Misioni*

TE TAU TUURAA EVANELIA NO TE IRAA O TE MAU TAU

E TEIE nei, te mea e au ia tatou ia ite, o teie ĩa, eaha te auraa o te parau, te ĩraa o te mau tau, e a ore rā, te faarahiraa o te mana? Teie to'na auraa, oia hoi, te tau tuuraa evanelia o te ĩraa o te mau tau, ua amuihia mai ĩa te mau tau tuuraa evanelia tei horoahia mai, mai te haamataraa o teie nei ao e tae roa mai i teie nei. Ua horoahia ia Adamu te tau tuuraa evanelia matamua. E ia Noa ra, ua horoa-atoa-hia te hoē tau tuuraa evanelia. E mai ia Noa ia Aberahama, e mai ia Aberahama ia Mose, e mai ia Mose ia Elia, e mai ia Elia ia Ioane Bapetizo, e mai ia Ioane Bapetizo ia Iesu Mesia, e mai ia Iesu Mesia i ta'na mau aposetolo o Petero, Iakobo e Ioane, ua farii ratou atoa i roto i to ratou mau tau tuuraa evanelia na roto i te heheuraa no ô mai i te Atua, no te faaotiraa i te opuaraa rahi no te faaho'iraa tei parauhia e te mau Peropheta; e te hopea o te reira, o te *Tau Tuuraa Evanelia No te Iraa O Te Mau Tau* ĩa, e i roto i te reira e faaotihia'i te mau mea atoa tei parauhia mai, mai te haamaniraahia mai ā o te ao nei.

Papahia e H. ratc, H. G. Wilde

EDITORIALE

UA TOHUHIA MAI E TAE MAI TE MESIA

*F*IA tae i te matahiti e ono hanere i muri a'e i te matahiti i faarue ai to'u metua i Ierusalema ra, e faatupu ai te Fatu te hoê peropheta i rotopu i te ati Iuda ra, oia hoi, te hoê Mesia, te Faaora o to te ao nei. (I Nephi 10:4)

Ua ite te peropheta ra o Nephi i te matahiti e tae mai ai Iesu Mesia i nia i te ao nei e ua papai oia i te reira i ta'na mau papairaa mo'a. Na roto i te mana o te Varua Maitai i ite ai oia i taua mau mea ra, e aita roa oia i feaa i te faaiteraa'tu i te reira i to te ao nei.

Na roto i te tupu-mau-raa o te tohuraa i tohuhia e te hoê peropheta e ite tatou e, e peropheta mau anei oia e aita anei.

E tai'o â tatou i te vetahi â mau papairaa tei papaihia e te tahi peropheta no te ati Nephi no te tupuraa o taua tohuraa nei: *E inaha, i te toru o te faarooraa'tu i te reo ra, ite atura ratou i te reira, a na ô mai ai ia ratou ra e,*

Inaha, o Tau tamaiti here, ua mauruuru roa vau ia'na, ua haamaitai hoi au i to'u i'oa ia'na; a faaroo mai ia'na.

E te ite ra ratou i te reira, ua nânâ a'era i to ratou mata i nia i te ra'i, e ite atura i te hoê taata i te pouraa mai mai te ra'i maira; e te ahuhia oia i te ahu teatea ra, pou maira oia, tia noa ihora i rotopu ia ratou, e ua hi'o a'era te mata o te mau taata atoa ra ia'na, aita a'era i tia ia ratou ia parau noa'tu to ratou vaha, aita noa'tu te tahi i te tahi, aita atura ratou i ite i te auraa, i mana'o hoi ratou e, ua fa mai te hoê melahi ia ratou.

Ua faatoro a'era oia i to'na rima, e ua parau atura i te feia ra, i te na ôraa e,

Inaha, o vau nei, o Iesu Mesia, o ta te mau peropheta i faaitite mai e tae mai i te ao nei;

E inaha, o vau te maramarama e te ora o teie nei ao; ua oti ta'u inuraa i ta te a'ua avaava i horoahia mai e te Metua na'u ra, ua faahanahanahia hoi te Metua na roto i ta'u rave-raa i te hara o to te ao nei i nia iho ia'u, i rave ai au i to te Metua hinaaro i te mau mea atoa mai te matamua mai â.

E oti a'era ia Iesa taua parau ra, ua mairi ihora te mau taata atoa ra i raro i te repo, i haamana'o hoi ratou e, ua tohu-ê-hia na i rotopu ia ratou ra e, ua oti ta Iesu haereraa i te ra'i, e faaitite mai oia ia'na iho ia ratou i reira. III Nephi 11:6-12.

na
i o
ru
A

Epe

Epe

Epe
Epe

Ia
tei p
fauf
hia
riro

U
rave
nobi
ra, a
hoê
patu
Buk

Ia
tato
bilis
seph

Oi
mau
hoi.

TE PARAU AUTAHU'ARAA

NO TE AVA'E EPERERA
TE MAU TAATA TUIROO O TE BIBILIA

E MAU UIRAA:

1. O vai teie taata ? 2. Eaha to'na toroa ? 3. Eaha te huru o to'na maitiraahia ? 4. Ihea ta'na ohipa i ravehia'i ? 5. Eaha te ohipa i oti ia'na ? 6. Ua mauruuru anei te mau taata ia'na ? 7. Ua mauruuru anei te Atua ia'na ? 8. E manuia anei tatou ia pee tatou ia'na ? A tatara mai.

Eperera 7. IOSEPHA. Mataio 1:1-16; Luka 2:48, 51; 3:23-38.

Eperera 14. MARIA. Mataio 1:18-25; 2:11, 13, 14; 12:46; 13:54, 55; Mareko 3:21, 31; 6:3; Luka 1:26-56; 2:4, 5, 7, 16-52; 8:19; Ioane 2:2-5; 19:25-27; Te Ohipa 1:14.

Eperera 21. HERODA. Mataio 2:3-9, 16-19.

Eperera 28. A haapii atu i te parau no na Haapii Hahaere no te ava'e i mua, mai tei papaihia i roto i te ava'e no Eperera.

Na Te Mau Haapii

Mahaere na te Mau Utuafare

Ia ite te Feia Mo'a atoa i te mau haapiiraa maitai atoa tei papaihia i roto i te Buka a Moromona e maitai ai. No te faufaa rahi o te Buka a Moromona i te Evanelia tei faaho'i-hia mai i te tau hopea nei, ia farii tatou i te reira e tia'i ia riro tatou ei feia faaroo papu i te Ekalesia.

Ua opere-haere-hia te Buka a Moromona i te mau vahi e rave rau i na matahiti 110. I roto i taua taima ra, ua faai-nohia, e ua faahapahia, e ua patoi-atoa-hia hoi taua buka ra, aita râ te hoê pene, aita atoa te hoê faaiteraa, e aita te hoê parau i ite-hape-hia. Area, ua itehia vetahi mau parau paturu tei faaite papu mai ia tatou e, e parau mau ana'e te Buka a Moromona.

Ia tai'o maite tatou i te Buka a Moromona e faarahihia to tatou faaroo i te Evanelia, e faarahihia to tatou ite i te Bibilia, e e ite hoi tatou e, ua faaurû-Atua-hia te ohipa a Io-sepha Semita e ta te Ekalesia.

Oia ia, a imi outou i te mau parau paari no roto mai i te mau buka maitai; a imi i te ite na roto i te haapii e te faaroo hoi. B. F. 88:118.

TÈ SOTAIETE VAHINE TAUTURU

No te Ava'e EPERERA

Irava tamau aau: 1 Nephi 9:6

Ua ite ra te Fatu i te mau mea atoa mai te matamua mai â; i faaineine ai oia i te ravea e faatupuhia'i ta'na atoa ra mau ohipa i rotopu i te mau tamarii a te taata nei; inaha hoi, tei ia'na te mana ia faatupu i ta'na atoa ra mau parau. E te reira ia. Amene.

Mahana Maha (Matamua)

Mahana iritiraa mana'o e te himene na te mau tuahine.

Parau tumu na va tuahine hahaere: Te Mau Horoa.

Te mau mea maitatai i ho-mai-hia mai, e te mau mea tia roa e maitai roa'i, no nia ia mai nia mai ia i te Metua o te maramarama, aore roa e hiro-hirouri ia-'na ra, aore hoi e huru-ê-raa e vahi iti noa'e. (Iakobo 1:17)

A tai'o atoa i te "Parabole o te mau Taleni." (Mataio 26:14-30)

Mahana Maha (Piti)

Te mau Feia Tuiroo no te Buka a Moromona.

LEHI

1. Te mau tohuraa o Lehi no nia i te haamouraa o Ierusalem. To'na aratairaa i to'na utuafare na roto i te me-debara. I Nephi 1:4, 18, 19; 2:2-4; 3:1-6; 4:4; 5:17-22.

2. Te moemoea a Lehi no nia i te raau o te ora. I Nephi 8:36-38.

Mahana Maha (Toru)

1. Te mau tohuraa o Lehi no nia i te Faaora. I Nephi 10:4; 16:8.

2. Te mau a'o a Lehi i ta'na mau tamarii. II Nephi 1:20-23; 2:6-8, 28; 3:11-24; 4:4-7.

3. Te poheraa o Lehi. II Nephi 4:12.

Mahana Maha (Hopea)

Mahana raveraa ohipa na te mau tuahine.

TE HAAPIIRAA SABATI

No te Ava'e EPERERA

PUPU PARAIMERE

Irava tamau aa: *I Samuela 9: 17*

E ite a'era Samuela ia Saula, ua parau maira Iehova ia'na, A hi'o na i te taata ta'u i parau atu ia oe ra, oia teie o te a'o ia i to'u ra mau taata.

Eperera 7. Te hopea o te mau tavana. I Samuela 7:2-17.

Eperera 14. Te taata roa o tei maitihia ei arii. I Samuela 9; 10.

Eperera 21. Te mau taata no Iabesa i roto i te ati. I Samuela 11.

Eperera 28. Hi'opoaraa.

PUPU PITI

Irava tamau aa: *Genese 32: 12*

Ua parau maira oe e, E hamani maitai atu â vau ia oe, e e faariro vau i to oe na huaai mai te one tahatai, eita e tia ia tai'o ra i te rahi.

Eperera 7. Te metua vahine no te huaai tei maitihia, oia hoi o Rebeka. Genese 24.

Eperera 14. Te oraraa o Iakoba. Genese 25:20-34; 27; 28; 32.

Eperera 21. Iosepha te tamaiti moemoea. Genese 37:39-50.

Eperera 28. Hi'opoaraa.

PUPU TORU e te MAHA

Irava tamau aa: *Genese 12: 1-3*

I parau mai hoi Iehova ia Aberahama, E haere ê mai oe i to fenua na, e to fetii, e te utuafare o to metua na, i te fenua na'u e faaite atu ia oe na: e e haamaitai au ia oe, e faarahi atu vau i to oe i'oa, e e riro oe ei maitai.

Eperera 7. O na tamarii tootoru a Noa. Genese 9:18-19, 22-27.

Eperera 14. Aberahama e to'na haamaitairaa e to'na haereraa i Aiphiti. Genese 12:1-20.

Eperera 21. To Aberahama e Lota faataaraa. Genese 13: 1-12.

Eperera 28. Hi'opoaraa.

Irava tamau aau: *Mareko 2:27,28*

Eperera 7. FAATURAHIA E TE TAATA EÊ E PATOIHIA E TO'NA IHO. Ioane 4:43; 6:42; Matabio 13:55-57; Mareko 6:3,4; Luka 4:4-37.

Eperera 14. TE OHIPA A TE FATU I GALILEA. Mataio 4:18, 19; 8:2-4; 9:2-13; Mareko 1:40-45; 2:1-22; Luka 5:12-24.

Eperera 21. TE FATU NO TE SABATI. Ephesia 1:22; Mareko 2:27-28; Ioane 5:18; Hosea 2:11; 2:23; Mataio 28:17-20; Galatia 3:24, 25; Hebera 4:9-11; 10:9; Te Ohipa 20:7; I Korinetia 16:1,2; Apokalupo 1:10; Kolosa 2:16; Levitiko 25:1-12; Exodo 35:2; Mataio 5:34; 19:17-19.

Eperera 28. TO TE TINO AHURU MA PITI MAITI-RAA-HIA. Ma-
taio 10:1-4; Mareko 3:13-19; Luka 3:13; 6:
12-16; Ioane 15:16; Te Ohipa 1:22.

No te Ava'e EPERERA

Irava tamau aau: *III Nephi 18:20*

E te mau mea atoa ta outou e ani i te Metua i to'u ra i'oa, o te tia iā, a faaroo ai e noaa taua mau mea ra, e noaa iā ia outou.

MAHANA MAHA MATAMUA

Te Tavini Haapao Maitai

I te tahi taimē te vai ra te hoê arii o tei hinaaro i te hoê tavini o te rave noa i te mau ohipa atoa ta'na e hinaaro. E taata paari mau ra taua arii ra, e ua imi oia i te hoê ravea ia itehia ia'na te taata bei hinaarohia e ana.

Ua ite te mau taata atoa o to'na basileia i te here o te mau tavini i taua arii ra, e ua oaoa hoi ratou i te taviniraa ia'na. No reira, i te taime a faaite ai taua arii ra e, te hinaaro ra oia i te hoê taata no te rave i te ohipa i roto i ta'na aua tiare, ua rahi roa te taata tei haere mai. Maiti ihora te arii, no

rotopu ia ratou ra, i na taata e piti tei au maitai i to'na manao'no no taua ohipa ra. Ua faaite atura oia ia raua i te hoê ete rahi e ua parau atu ia faaî te reira i te pape.

I muri a'e i to raua haamataraa i te rave i te ohipa, vaiiho maira oia ia raua ma te parau atu, "Ia tae i te ahiahi e ho'i mai au e hi'o i ta orua ohipa, e mai te mea ua rave maitai orua i te reira, e aufau ia vau i ta orua moni."

Tie atura raua i te pape e tito atura i roto i te ete i te tahi maa taime, e i reira parau maira te hoê o raua, "Eaha te faufaa ia rave i teie ohipa maamaa? Eita tera'e ete e i ia taua, no te mea te tahe oioi noa ra te pape i rapae i te taime e titohia'i e taua."

Pahono atura te tahi, "E ere ia te reira i te ohipa na taua, ua faaue mai te arii ia faaî taua i tera ete i te pape, e mea papu ua ite oia e, eaha te mea ta'na i hinaaro."

Na ô maira te taata matamua e, "A rave ia mai te au i to oe hinaaro, area, vau nei, eita vau e rave faahou i te hoê ohipa maamaa mai teie te huru, noa'tu e aufauhia vau no te raveraa i te reira," e i reira vaiiho ihora oia i ta'na patete e haere atura.

Area, o Hassen, te piti o te taata ra, aita oia i parau noa'tu i te hoê parau e ua rave noa oia i te ohipa i te tie noaraa i te pape, a manii atu ai i te reira i roto i te ete e tae noa'tu i te ahiahi.

Ia tae i te ahiahi ua fatata roa te apoo pape i te pau, e i to'na titoraa i te patete hopea i roto i te ete, ite ihora oia i te hoê mea anaana, oia hoi, te hoê tapea rima nehenehe roa.

I taua taime ra tae maira te arii e horoa'tura Hassen i taua tapea ra ia'na, e na ô maira te arii ia tapea oia i te reira na'na. E i reira parau maira te arii, "I teie nei ua ite au e, e tia ia'u ia tiaturi ia oe ia rave i te mea tia, e te mau mea atoa ta'u e faaue atu. E riro oe ei nia'e i ta'u mau tavini atoa ra i teie nei."

MAHANA MAHA PITI

Te Tiai Mamoe Maitai

I te mau tau i mairi a'enei, i te hoê fenua i te atea ê roa, i ô roa mai i te moana ra, te ora ra te hoê tiai mamoe, e taata maitai roa. E taata rahi oia e te puai hoi. Te mau taata atoa tei ite maitai ia'na, ua here roa ratou ia'na, e te mau taata atoa o taua fenua ra, na ite ratou e, e taata maitai roa oia e e mea here roa na'na ta'na mau mamoe.

Ua tuu taua tiai mamoe ra i ta'na mau mamoe i roto i te hoê vahi te reira te matie maitai roa tei parare i te mau va-

hi atea roa, e i ropu mau i taua vahi ra te tahe ra te hoê a-
navai iti, e e haere te mau mamoe i reira no te inu i te pape
ia poiha ratou.

I te hoê poro o taua vahi ra, ua hamani taua tiaï mamoe
ra i te hoê aua, e e uputa rahi to taua aua ra. I te mau po a-
toa ua arataï taua tiaï mamoe maitai ra i ta'na mau mamoe
na roto i taua uputa ra, e a tomo ai ratou ra, e tia noa oia
ma te tai'o ia ratou. Ua ite oia ia ratou atoa e no to'na he-
re ia ratou ua hinaaro oia ia ite e, tei te vahi maitai ratou i
te mau po atoa. Ua ite te mau mamoe e te mau fanau'a atoa
i te tiaï, e i te taime e tomo ai ratou na roto i taua uputa ra,
e parau ratou, "Ba, ba," mai te mea ra e, te na ô maira ra-
tou e, "A taoto maitai, e te tiaï mamoe maitai, ua here ma-
tou ia oe."

Ua faaati noa te tahi mau mou'a teitei i taua vahi ra, e i
te tahi mau taime ua tuu taua tiaï ra i ta'na mau mamoe ia
pauma i nia i te mou'a no te faaetaetaraa i to ratou mau a-
vae. E i te tahi mahana, a pauma'i ratou i nia i te mou'a,
tupu ihora te hoê vero rahi. Pii atura te tiaï i te mau mamoe,
e pii tei mâtauhia e ratou, e ua haamata ratou i te haere i te
fare. Puai roa'tura te mata'i e mairi maira te ûa, area, ua
haavitiviti ratou i te haere e aita i maoro tae atura ratou i te
uputa. Tia'tura te tiaï mamoe i te pae uputa, ua rari e ua
toetoe, no te tai'o ia ratou, e ite atura oia e, ua moe te hoê
pinia mamoe. Ua moe paha i nia i te mou'a. Ua poiri i rei-
ra, ua rohirohi, ua poia, e ua toetoe roa te tiaï mamoe, area
râ, ua here oia i ta'na mau mamoe, no reira, aita i tia ia'na
ia vaiiho i te hoê o ratou i roto i te peapea.

No reira, haere faahou atura oia i nia i te mou'a ma te pii
i taua mamoe iti ra i to'na ra reo mārû. Haere atura oia i
tera vahi e i tera vahi e haere atura i te vahi teitei a'e, e ai-
ta i maoro, faaroo atura oia, noa'tu te puai o te mata'i, i te
hoê reo iti paruparu i te piiraa mai, "Ba, ba," mai te mea
ra te na ô maira e, "Teie au, teie au, ua pauma vau i nia roa
no to'u mau avae rii, e eita e tia ia'u ia pou faahou i raro."

Haere atura te tiaï mamoe maitai i taua vahi ra e ite atu-
ra i taua pinia mamoe ra tei mau i ropu i na ofai rarahi, e
ua pepe atoa hoi te avae, e ua repo roa to'na hurnhuru uo-
uo ra i te ûa e te vari. Tuturi ihora te tiaï mamoe maitai ra,
rave ihora i taua pinia ra i roto i to'na rima e amo atura ia-
'na i te fare. Afai atura oia ia'na na roto i taua uputa rahi
ra e tuu atura ia'na i rotopu i te tahi mau mamoe ra. E ua
oaoa roa te mau mamoe no te mea e fatu maitai e te here
hoi to ratou.

Ore atura te vero e haamata faahou atura te mau fetia i te anaana mai, tiatonu atura te tia mamoe maitai i to'na mata i nia i te ra'i mai te huru te parau ra oia e, "E tau Metua e, ua ora faahou mai â te hoê mamoe na oe ra."

MAHANA MAHA TORU

Te Here Mau

I te hoê mahana, tai'o atura vau i te hoê parau tei na ô mai e, Te haere ra te hoê tamahine iti na nia i te purumu, e te amo ra oia i to'na tuane iti tei teiaha roa no'na. Farerei maira te hoê vahine ia'na. Aroha ihora oia i taua tamahine iti ra e hinaaro ihora oia ia tauturu ia'na e na ô maira oia, "A horoa mai na i tena aiû e na'u e amo ia'na; e mea teiaha roa oia no oe ia amo."

Pahono atura taua tamahine iti ra, "Mauruuru ia oe, e teie nei vahine, e ere oia i te mea teiaha, e tuane oia no'u."

MAHANA MAHA HOPEA

Te Tamaiti Otare

I te hoê tau te ora ra te hoê taata tei amu i ta'na faraoa, i te mau mahana atoa, na roto i te hooraa i te vahie ta'na e tapu i te mau mahana atoa. Ua tauturu ta'na vahine e to raua na tamarii toopiti, o Valentino e o Maria, ia'na i roto i ta'na ohipa. Na tamarii paieti raua e te faaroo hoi, e ua riro raua ei oaoaraa e ei tamahanahanaraa no to raua na metua.

I te hoê po, i te tau toetoe, ua haaputuputu taua utuafare maitai ra i pihaiho i te iri amuraa maa no te amuraa i ta ratou maa vahi faraoa iti, a tai'o noa'i to ratou papa i te tahi mau irava no roto mai i te Bibilia. E i te taima mau a parahi ai ratou i raro, patotohia maira te haamaramarama e faaroo atura ratou i te hoê reo iti i te aniraa mai e,

"A tuu ia'u ia tomo i roto na! E tamarii iti au e aita ta'u e hoê maa no te amu, e aita to'u e vahi no te taotoraa. Ua toetoe roa vau e te poia hoi. E teie nei mau taata maitai e, a tuu ia'u ia tomo i roto na!"

Tia oioi atura o Valentino e o Maria e horo atura raua i te uputa, e iriti atura ma te parau atu,

"A tomo mai i roto, e tena tamaiti aroha e, aita hoi ta matou maa i rahi, ua huru faito noa i ta oe iho, area râ, e vahi matou i te reira e oe atoa."

Tomo maira taua tamaiti ra e haere atura i pihai iho i te auahi no te tamahanahana ia'na. Horoa'tura na tamarii i te hoê tufaa o ta raua faraoa na'na e parau atura, "E mea pa-

pu ua rohirohi roa oe; a haere mai, a taoto i nia i to maua ro'i, e taoto maua i nia i tera'e parahiraa i te pae auahi."

Pahono maira taua tamaiti otare ra, "Ia faautu'a mai te Atua, tei nia i te ra'i ia orua no to orua maitai."

Aratai atura raua ia'na i roto i to raua piha iti, tuu atura ia'na i roto i to raua ro'i e tapoi atura raua ia'na i te aahu taoto ma te mana'o i roto ia raua iho, "Aue, eaha te faito no to taua mauruuru! E piha mahanahana to taua e te hoê ro'i maitai, area, tera'e tamaiti ra, aitata'na e hoê mea, maorirâte ra'i ei tapoi e te fenua ei ro'i." I to to raua na metua haerera i nia i to raua ro'i, tarava ihora o Valentino raua o Maria i nia i te parahiraa i pihai iho i te auahi ma te parau atu te tahi i te tahi, "Ua oaoa taua tamaiti iti otare ra i teie nei, no te mea ua mahanahana oia i teie nei! A taoto maitai." E aita i maoro varea roa a'era raua.

Aita i maoro te hora o to raua taotoraa, ara a'era o Maria e ua turai oia i to'na tuane ma te parau mârû atu, "E Valentino, e Valentino, a ara mai! A ara mai! A faaroo na i tera'eupaupai te pae haamaramarama." Oro atura o Valentino i to'na nau mata e faaroo atura. Faaroo atura oia i te himene navenave e te tai navenave o te kinura e rave rahi.

Faaroo noa'tura na tamarii i te himene nehenehe, e ua au ia raua e ua faa'i te reira ia raua i te oaoa faito ore. Haere atura raua i te pae haamaramarama no te hi'o i rapae. Ite atura raua i te maramarama tarona i te pae o te hitia o te râ, e i mua i te fare, i roto i te hiona, te tia noa ra te tahi mau tamarii tei ahuhia i te ahu ario anaana e tei tapea i te kinura e te vivo i roto i to ratou mau rima.

Î roa'tura raua i te maere i to raua iteraa i te reira e ua tamau noa o Valentino raua o Maria i te hi'o na te maramarama, e i reira faaroo atura raua i te hoê maniania i muri ia raua, e i to raua hi'oraa, ite atura raua i taua tamaiti otare ra i te tiaraa i pihaiho ia raua. Ua ahuhia oia i te hoê ahuhia auro, e tei nia i to'na rouru nehenehe te hoê korona auro anaana. Parau maira oia i na tamarii. na ô maira,

"O Vau, o te Varua Tauturu, o te haere noa na nia i teie nei ao mai te imi i te mau ravea ia afai mai i te oaoa e te mau mea maitai na te mau tamarii maitai. No te mea ua faataoto mai orua ia'u i teie po, e faarue au ia orua ma te vaiiho mai i ta'u mau haamaitairaa." I to'na parauraa i te reira parau, moe atura oia i mua i to raua mata, e te mau tamarii himene —e mau melahi. E i te reira taime tae maira i taua na tamarii ra te îraa no te oaoa mai tei ore roa i itehia e raua mai mutaa ihora.

T
ra,
na
Tak
I
raro
tou,
haer
haer
Stev
H. I
N. H
T. E
E
ohip
I
taifa
tua e
E
peet
oia h
Huti
te te

B.

Fra

E
e tato
tahua

Me
i te r
oara
e am
upoo
hoi, t
ua ha
i nia

Ua
dier,
25 no

PARAU API NO TE MISI

PARAU FAAITE

Te faaite-faahou-hia'tu nei e, e faatiahia te Amuiraa Epere-ra, no te Ekalesia a Iesu Mesia i te Feia Mo'a i te Mau Mahana Hopea Nei, i te mau Amaa i Vahitahi, Hikueru, Nihiru, Takaroa, Raraka, Papeete e i Tubuai.

I roto i te ava'e no Tenuare i mairi a'enei, ua faarue te mau Orometua i raro nei i Papeete no te haere i te mau vahi raveraa ohipa i faataahia no ratou, oia hoi, o Farani, F. D. Sanford e o Eledona, E. A. Peterson, no te haere i Anaa; o Lui, H. L. Randall raua o Setanela, S. B. Nance, no te haere i Hao; o Pereti, P. B. Asay, Re, R. O. McEntire, Iosepha, J. G. Stevens e o Lavora, L. C. Chapman no te haere i te mataeinaa; o Viri, W. H. Miller raua o Petarona, L. Y. Peterson no te haere i Ragiroa; o Nile, N. R. Chugg raua o Ri, R. L. Halverson no te haere i Ahe; e o Etera, E. T. Benson raua o Noromana, N. F. Price no te haere i Kaukura.

E te parau atu nei matou ia ratou, ia itoitou ratou atoa i roto i ta ratou ohipa.

I roto atoa i te ava'e no Tenuare i mairi a'enei, ua faarue o Teriki Mataifano â Gariki e to'na hoa, e o Tutarautua â Taverio, e o Tuhiva â Maki-tua e o Varoa â Ganahoa i Papeete nei no te ho'i atu i to ratou fenua.

E i roto atoa i te ava'e no Tenuare i mairi a'enei, ua tae atoa mai i Papeete nei, no Takaroa mai, te mau taata teie to ratou mau i'oa i raro nei, oia hoi, o Vahinerii â Maire, Temahuta â Tane e ta'na vahine, Tagihara â Hutihuti, Tepivai â Taukaha e o Taitua â Mapuhi, e ua faaite mai ratou e, te tere noa ra te mau ohipa a te Ekalesia i te fenua ra i Takaroa.

PARAU API ORC'A

BAPETIZORAA

I'OA	MAT.	MAH. BAP.	FENUA	NA VAI I BAPETIZO
Francois Hoffman	8	6-10-39	Tubuai	Teao â Nauta

TE NOELE E TE MATAHITI API I ROTO I TE TAIME TAMA'I

E piti huru Noele e te Matahiti Api i tupu a'enei, oia hoi, tei haapaohia e tatou atoa o tei ore â i farerei i te ati tama'i e tei haapaohia e to nia i te tahua aroraa.

Mea fanao mau te paeau taata o te ao nei, mai ia tatou atoa nei, na roto i te nehenehe-maitai-raa te haapaoraa i te mahana Noele e na roto i te oararaa no te mahana matamua o te Matahiti Api 1940. Area, te paeau taata e amo ra i te hopoia o te tama'i, oia hoi, to tatou mau upoo faatere e te mau upoo faatere nuu, e te paeau taata e tutava ra i nia i te tahua aroraa, oia hoi, te mau raatira faehau e te mau faehau hoi - oia atoa to nia i te moana, ua haapao ana'e ia vera i taua na mahana ra na roto i te fariu noa te mata i nia i te ohipa paruru ai'a.

Ua riro râ ei tamahanahana aau na parau e toru i orero-atoa-hia e Daladier, to tatou Faatere Hau Rahi e te Faatere Hau Ohipa Puai Tama'i i te 25 no Titema i pau a'enei.

Te na ô ra te parau a Daladier e, Te Noele a te Farani, o te hoê ia Noele no te tiaturi. Te Noele a te Tcheco e te Polane, o te hoê ia Noele no te ati e te mauui. Area, te Noele a te enemi ra, o te hoê ia Noele no te amarraa i te utu'a tairihia e te parau-tia.

E parau mau ta Daladier, no te mea ua rahi ahururaa tane maa, monamona, e te faraoa monamona i tae i te nuu Farani e Paratane i nia i te re-ni ohiparaa, no te Noele e no te Matahiti Apî. Area, ta te nuu enemi ra, o te nanearaa ia o te taraniraa maa ta te reira i farerei i te mahana Noele e no te Matahiti Apî.

Ua taniuniu hoi Daladier i te Arii no Paratane, oia hoi o Tihoti VI, no te aroharaa'tu ia'na no te Matahiti Apî e no te haapapu faahou atoa'tu i te papu o te tahoêraa o Farani ia Paratane. Ua na reira atoa Tihoti VI ia Daladier e ua tû roa ta raua parau e, e vai tahoê tumu roa Farani e Paratane no te aro noa no te tinai-roa-raa i te faatereraa taparahi taata.

E parau mahanahana atoa ta na upoo o na Basileia rarahi, oia hoi, o Farani e o Paratane, no te mea, ua tia roa ia tuparari-mau-hia e raua te faatereraa ri'ari'a a te mau upoo e faatere ra ia Purutia, o ratou te tumu o te manii-faahou-raa o te toto taata. O ratou atoa te tumu o te tapitapi o te oraraa hau e te fanao o to te ao nei, na roto i te ueneraa ratou i te mau peu ino atoa na nia i te mau vahi atoa i torohia e taua faatereraa ra, e na roto hoi i te taeraa to ratou rima viivii toto na nia i te mau nunaa rii ravea ore.

O Rutia hoi, te Basileia o tei riro te mana'o i te faatereraa Communiste, ua pee atoa ia i te e'a o te ino, inaha, ua oti te afaraa o Polane i te haruhia e ana - oia atoa na Hau rii Esetonia, Latavia e Lituania. E ua ava'e e tia-hapa i teie nei to Rutia tonoraa i to'na mau nuu rarahi i Finilane no te a-ro i te reira nunaa. E na roto i to Purutia e to Rutia na reiraraa, ua haapae mau ia raua i te parau-tia e i te mau ture mo'a paruru nunaa atoa ra.

E parau mau hoi teie, no te mea ua tupu mau teie tama'i apî na roto i te haapaeraa Purutia e Rutia i te mau faataaraa tia o tei ravehia i mua'tu e i muri a'e i te tama'i rahi 1914-1918. Inaha, ua mahere Autiritia, Tcheco e te afaraa o Polone ia Purutia, e ua mahere hoi te mau fenua rii o tei faataahia te i'oa i nia nei. E tera mau huru i ravehia e Purutia e Rutia, mea na roto i te faatura ore e te haapao ore i te mau parau fafau ta te mau Basileia atoa, e ta raua atoa iho i farii e i tãpũ atoa hoi.

Ia upootia papu mau â ta Farani e ta Paratane tutava e te faaoromai tei-maha no te mea, eita mau te mau nunaa atoa o te ao nei e hinaaro e farerei i te ati aifaito i te ati o te mau nunaa i raro a'e i te faatereraa ri'ari'a e te ati a te enemi. Aore e Basileia rahi, e aore râ e Basileia rainai i te ao nei e hinaaro atoa ra i tera mau huru. No reira hoi tatou i faaroo pinepine ai e, te haapaari ra tera e tera fenua i to ratou otia no te ata'ata i te enemi.

E te reira te hoê ia hopoia rahi teiaha o te riro ei haaveve hoi i te afata moni faatereraa fenua. E taa ê atu ai te moni rahi e te taime rahi e pau no te reira mau huru o tei tupu mai, na roto â i te opua nanao a Purutia e Rutia - te vai atoa ra te tahi atu â mau'araa moni rahi, oia hoi, te tufaa rahi moni no te faaatiraa i te nuu faehau. Teie i muri nei te tahi numeraraa noa no nia i te huru o te tahi tufaa o te hopoia a Farani, to tatou Hau Metua. Mai te au i te parau a Daladier i te nuu farani, te tutava atoa nei to roto ia Farani no te paturu i te tereraa o te ohipa tama'i.

Teie te pau i te rahiraa faehau o te nuu Farani i te mahana hoê i teie tama'i, e 3 mirioni kilo faraoa - e 2 mirioni e e 500 tauatini kilo i'o puaatoro - e 3 mirioni ritara uaina - 150 tauatini kilo taofe e e 200 tauatini kilo tihota. Mea taa ê atu â ia te rahiraa ahu, te tiaa, te totini, te hatua, e oia atoa te mauhaa e te ofai.

I roto i te tama'i rahi 1914-1918 ra, 15 mirioni e e 500 tauatini capote (pereue faehau), e 31 mirioni piripou, e 78 mirioni totini e 10 mirioni hatua ta te Hau Farani i hoo no to'na nuu faehau. Ia oti ia teie tama'i apî e papu ai te huru o te rahiraa i faataahia no te nuu Farani o teie tau.

Na teie numeraraa e faaite papu ia tatou atoa i te huru o te vetahi hoipoia e amohia ra e to tatou Hau Metua na roto i to'na hinaaro paruru ia tatou atoa Taa ê atu ai tera huru - e moni â pai ia tera - te horoa ra, te manii atoa ra te mea tei hau roa'tu i te nounouhia e te Hau Metua - o te toto ia o ta'na mau tamarii, no te tinai i te enemî, e no te faaherehere i ta te mau tupuna i faatupu ra.

No reira e tia ia tatou atoa ia feruri mai te mana'o paari, mai te mana'o ara, e mai te mana'otaata Farani mau e, e ere i te ohipa rave ohie te faanahonahoraa i te mau mea atoa e papu ai te tereraa ohipa tama'i.

Ia farii maitai tatou paatoa i te mau huru atoa e ravehia ra i roto mai ia Farani, i te hiti e i rapae mai ia Farani, no te mea ua na rotohia te mau mea atoa i te feruri, i te aravihi, i te ara maitai, e i te itoito.

Eiaha mau tatou e fiu i te huru o te parau apî e tae mai i ò tatou atoa nei o tei faaite noa mai e ua farerei e ua û te mau paturui o na pae e piti i tera e i tera mahana.

Ua ite hoi tatou e, eaha mau te ohipa e tutavahia e te nuu e te pûpû paturui. O te reira mau faehau te tuuhia i mua no te hi'opoa i te huru o te enemî, e o te ohipa atoa ia a te mau paturui enemî.

Ia tai'o tatou i te parau no te hoê tapao anaana Farani aratai pûpû paturui i mua i te reni, i roto i teie tama'i, e papu ai tatou e e ohipa rahi ta te paturui. I te hoê mahana, ua faauehia te hoê pûpû paturui farani e haere i mua i te reni, noa'tu te rahi o te ofai pupuhi enemî e mairi noa ra i te mau taime atoa. Ua pepe hoê faehau paturui - ua pohe roa hoi te tahi, ua afai-oioi-hia te reira i muri. E vero rahi i taua taime ra - e poiri to taua vahî fîfi ra.

Te farerei tinoraa ia te tapao anaana Farani i te hoê faehau Purutia, e mitaraie nainai to te rima e te pupuhi tiriimu hoi to te hatua. Ma te itoito Farani mau, ua haru taputo te tapao anaana i taua purutia ra mai te huri ia'na i nia i te fenua no te haru i taua mitaraie ra. Ua roaa mai te mitaraie i te tapao anaana, e na to'na pûpû paturui i haru i te tiriimu e te hatua ofai pupuhi e na topita e maha. E i te pakeruraahia taua faehau purutia ra, te ite-papu-raa-hia e, e raatira faehau mau oia.

Na tera huru e faaite mai e, eiaha te vetahi e haavahavaha i te mau huru e tupu ra, i teie mau mahana e i teie mau mahana i mua, e tae noa'tu i te vîraa te enemî na roto i te ati o te tahatuaraahia oia, e a ore râ, e tae noa'tu i te perehu-roa-raa te nuu enemî, mai te mea e tupu mau tei tiaturia-atoa-hia ra - oia hoi, te faaûraa rahi.

Area tatou o tei tumu te aroha i te feia i nia i te tahua aroraa, e maururu noa tatou i te parau apî, noa'tu te iti e te rahi, no te mea, ia iti te aroraa e tupu, e iti atoa ia te mauui o to tatou mau faehau aito.

Ahiri paha te feia haavahavaha e afaihia i nia i taua tahua ra, e maururu atoa paha ia ratou ia vai mârû noa te aroraa.

Te mea tia ia tatou paatoa, oia hoi, te huiraatira e fanao noa nei i te atea roa nei; o te faatû i to tatou mana'o i nia i te tiaturi, i te haapao, i te faatura i te mau upoo e faatere mai ra i to tatou pae - i te mau faehau e paruru maira ia tatou atoa.

E mai te huiraatira i roto i Farani ra, ia faaitoito atoa tatou i nia i te vahi o te iti e o te rahi no te patururaa i te Hau Metua, i te nuu e te parau-tia.

Eiaha tatou e mutamuta i tera e i tera mea - aita te mau faatere e te mau faehau i nia i te ohiparaa e mutamuta ra.

Ia tupu mau râ te rahiraa o to tatou mana'o e to tatou tiaturi i nia i te manuiaraa o te haa rahi e tutavahia ra no te paruru i to tatou Basileia, i te ao nei, i te oraraa hau e te fanao o te mau nunaa atoa.

Ia vai atoa i roto ia tatou atoa te huru itoito, taiâ ore, rurutaina ore o te tapao anaana Farani o tei ore i vî, i taiâ e i rurutaina i mua i te raatira faehau Purutia o tei vî e o tei roaa i te haru.

Na taua huru ra e faaohie te faaupootiaraa i te paeau tiamâ e i te paeau faahema ore i te nunaa. E taua paeau ra, o Farani ia e to'na apiti o Paratane.

E te reira parau ra, e ere ia e na te mau taata faufaa ore i parau e i feruri. Na te mau upoo râ o te mau Basileia rarahi e te nainai hoi - na te mau nunaa atoa o te ao nei - oia atoa te nunaa Farani no Oteania.

Te tutava atoa maira te mau upoo o te mau faaroo atoa - oia atoa, o Roosevelt, te Peretiteni no te Hau Marite, no te faatairuru i te taata o te mau nunaa atoa, e i to ratou atoa mau mana'o aau faaroo i nia i te faatupu i te hau, ia ore ia nanea te maniiraa o te toto taata e ia ore atoa ia nanea roa'tu te veveraa o te mau Basileia atoa.

E ore noa'tu ai ta tatou tauturu rima e tae i nia i te vahi ohiparaa - oia hoi te vahi e farerei ai te nuu o te Paeau Tiamâ e te nuu o te paeau Rave Hara, a tahoê ana'e tatou atoa i to tatou mana'o parau-tia i nia i to tatou paeau, e puai atoa te roaa mai na roto i te reira.

Ia papu i to tatou mau faehau e, te vai itoito e te vai tiaturi ra tatou, oia hoi to muri e to te atea - e rahi roa'tu ia to ratou itoito e to ratou atoa tiaturi i nia i te tahua faaafaroraa peapea.

Ia ora mau to tatou paeau, to tatou Hau, e ia upootia mau te parau-tia.

RURU

Te hoo: e 5 farane i te matahiti; e 10 fr. no na matahiti e 3

Neneihia i roto i te Piha Neneiraa a te Ekalesia a Iesu Mesia I Te Feia Mo'a i Te Mau Mahana Hopea Nei, Papeete, Tahiti.

Marcel Bonnet, Gérant. Kenneth R. Stevens, Imprimeur. U. C. Hunting, Editeur.
Rue Dumont d'Urville, Orovini, Papeete, Tahiti.